

光緒山西通志

名宦錄十五

錄一之十五

山西通志第一百十五

賜進士出身頭品頂戴兵部侍郎兼都察院右副都御史巡撫山西提督軍務臣張煦奏

旨監修

使臣 客將

婁敬齊人也說高帝西都關中賜姓劉氏拜為郎中號奉春君漢七年韓王信反高帝自往擊之至晉陽聞信與匈奴欲共擊漢上大怒使人使匈奴匈奴匿其壯士肥牛馬但見老弱及羸畜使者十輩來皆言匈奴可擊上使敬復往使匈奴還報曰兩軍相擊此宜矜夸見所長今臣往徒見羸瘠老弱此必欲見短伏奇兵以爭愚以為匈奴不可擊也是時漢軍已踰勾注二十餘萬兵已業行上怒罵敬曰齊虜以口舌得官今迺妄言阻吾軍械繫敬廣武遂往至平城匈奴果出奇

兵圍上於白登七日然後得解上至廣武赦敬曰吾不用公言以困平城吾皆以斬前使十輩言可擊者矣迺封敬二千戶為關內侯號為建信侯

杜詩字公君河內汲人少有才能世祖召見賜以棨戟復使之河東誅降賊楊異等詩到大陽聞賊規欲北渡乃與長史急焚其船部勒郡兵將突騎趁擊斬異等賊遂翦滅累遷南陽太守時人方於召信臣故南陽為之語曰前有召父後有杜母被徵卒司隸校尉鮑永上書言詩貧困無田宅喪無所歸詔使治喪郡邸賻絹千匹

右漢二人

安同遼東人太祖時為外朝大人加廣武將軍從征姚平於柴壁姚興悉眾救平太祖乃增築重圍以拒興同進計曰臣

受遣詣絳督租見汾東有蒙阮東西三十餘里徑路不通姚  
興來必從汾西乘高臨下直至柴壁如此則寇內外勢接重  
圍難固不可制也宜截汾曲爲南北浮橋乘西岍築圍西圍  
旣固賊至無所施其智力矣從之興果視平屠滅而不能救  
以謀功賜爵北新侯太宗卽位詔與肥如侯賀護持節巡察  
并定二州宣詔撫慰問其疾苦糾舉守宰不法同至并州表  
曰竊見并州所部守宰多不奉法又刺史擅用御府鍼工古  
形爲晉陽令交通財貨共爲姦利請按律治罪太宗從之於  
是郡國肅然同東出井陘至鉅鹿發畧四戶一人欲治大嶺  
山通天門關又築塢於宋子以鎮靜郡縣護疾同得眾心使  
人告同築城聚眾檻車徵還太宗以同雖專命而本在爲公  
釋之後除征東大將軍冀青二州刺史卒追贈高陽王諡恭

惠

元羽字叔翻顯祖第五子太和九年封廣陵王高祖將南討遣羽持節安撫六鎮發其突騎夷人甯悅車駕旣發詔羽與太尉元丕留守京師並加使持節詔丕羽曰留守非賢莫可太尉年尊德重位總阿衡羽朕之懿弟溫柔明斷故使二人留守京邑授以二節賞罰在手其祇允成憲以稱朕心丕對曰謹以死奉詔羽對曰太尉宜專節度臣但可副貳而已高祖曰老者之智少者之決何得辭也高祖友愛諸弟不忍早分詔羽從至雁門乃令歸賜如意以表心遷京之後北番人夷多有未悟羽鎮撫代京內外肅然高祖嘉之後以留守功增邑五百戶進號車騎大將軍卒謚惠

源懷隴西王賀子謙恭寬雅有大度襲爵拜征南將軍尋持

節督諸軍屯於漠南又督諸軍征蠕蠕六道大將咸受節度  
遷尙書令後例降公加衛大將軍景明二年除車騎大將軍  
詔爲使持節加侍中行臺巡行北邊六鎮恆燕朔三州振給  
貧乏兼採風俗考論殿最事之得失皆先決後聞自京師遷  
洛邊朔遙遠加連年旱儉百姓困弊懷銜命巡撫存恤有方  
便宜運轉有無通濟時后父于勁勢傾朝野勁兄于祚與懷  
宿昔通婚時爲沃野鎮將頗有受納懷將入鎮祚郊迎道左  
懷不與語卽劾祚免官懷朔鎮將元尼須與懷少舊亦貪穢  
狼籍置酒請懷謂懷曰命之長短由卿之口豈可不相寬貸  
懷曰今日之集乃是源懷與故人飲酒之坐非鞠獄之所也  
明日公庭始爲使人檢鎮將罪狀之處尼須揮淚而已無以  
對之懷旣而表劾尼須其奉公不撓皆此類也懷又表諸鎮

水田請依地令分給細民先貧後富時細民爲豪疆陵壓積年枉滯一朝見申者日有百數所上事宜便於北邊者凡四十餘條皆見嘉納正始元年九月蠕蠕率十二萬騎欲直趨沃野懷朔南寇恆代詔加使持節侍中出據北番指授規略隨須徵發諸所處分皆以便宜從事又詔懷子直寢微隨懷北行詔賜馬一匹細鎧一具御稍一枝懷拜受訖乃於其庭跨鞍執稍大呼顧謂賓客曰氣力雖衰尙得如此蠕蠕雖畏壯輕老我亦未使可欺今奉廟勝之規總驍悍之眾足以擒其酋帥獻俘闕下耳時年六十一懷至雲中蠕蠕亡遁旋至恆代按視諸鎮左右要害之地可以築城置戍之處皆量其高下揣其厚薄及儲糧積仗之宜犬牙相救之勢凡表五十八條自魏歷齊北鎮諸戍東西九城是也遷驃騎大將軍三

年六月卒年六十三

于忠烈子栗磳曾孫也正始二年以太府卿使持節爲西道  
大使刺史鎮將賊罪顯著者以狀申聞守令已下便卽行決  
忠劾并州刺史高聰賊罪二百餘條論以大辟還爲衛尉卿  
河南邑中正詔忠與吏部尙書元暉度支尙書元匡河南尹  
元萇等推定代方姓族又爲恆州大中正忠後兼侍中領軍  
尙書令擅朝政卒謚武敬

李煥趙郡人有幹用與鄜道元俱爲李彪所知恆州刺史穆  
秦據代都潛謀煥以書侍御史與任城王澄推究之煥先驛  
至州宣旨曉喻力執秦等景明初迎接裴叔業賜爵容城伯  
卒謚明

趙昶字長舒天水南安人曾祖襄家於代昶弱冠以才力聞



孝昌中起家拜都督周太祖平宏農擢爲相府典籤汾州叛  
再遣昶慰勞之皆知其虛實及大軍往討昶爲先驅遂破之  
拜武州刺史車騎大將軍儀同三司都督諸州軍事

段榮字子茂姑臧武威人祖信家於五原郡榮專意星象齊  
高祖建義山東贊成大策爲行臺右丞西北道慰諭大使巡  
方曉諭所在下之卒謚昭景

右後魏七人

于翼字文若謹子尙平原公主大象初拜大司徒詔巡長城  
立亭郭西自雁門東至碣石創新改舊咸得其要害進上柱  
國卒贈蒲州刺史謚穆

右北周一人

柳彧字幼文河東解人隋初累拜治書侍御史開皇末持節

巡省河北五十二州奏免賦污不稱職者二百餘人州縣蕭然莫不震懼仁壽初復持節巡省太原道十九州後坐事成懷遠鎮詔徵還至晉陽漢王諒遣使馳召與計事將入城而覺諒變度不得免遂詐中惡不食自稱危篤諒怒囚之及諒敗坐徙燉煌後徵還

徐文遠洛州偃師人方正純厚有儒者風開皇中官太學博士詔往并州爲漢王諒講孝經禮記坐除名大業初復爲博士公卿竇威等多從授學後爲唐博士封東莞縣男

右隋二人

褚遂良貞觀中以黃門侍郎爲巡察使夏縣衛孝女爲父報讐詣吏請罪遂良以聞太宗特令免罪給傳徙雍州令有司以禮嫁之

韓思彥南陽人高宗時以監察御史為并州道巡按使時有  
冤獄訊掠已服思彥獨疑之集兒童數百晨入暮出物色推  
訊遂得殺人真盜

李嗣真趙州人永徽初以御史中丞巡撫河東薦宋温瑾袁  
嘉祚李日知授州縣皆至大官及來俊臣用事上書諫不納  
出為潞州刺史

田歸道雍州長安人仁會子擢明經第累拜左衛郎將馱嘜  
請和將至單于都護府詔攝司賓卿往勞馱嘜請六胡州地  
及都護府地不得執歸道將害之歸道色不撓晉且讓為陳  
害福會有詔賜馱嘜絲粟許結婚於是更以禮遣歸道既還  
具陳馱嘜不臣狀請備邊已而果驗神龍中遷右金吾將軍  
卒追封原國公謚曰烈

李傑相州滏陽人舉明經神龍初爲河東道巡察黜陟使奏  
謀爲請使最先天中晉陝州刺史水陸發運使置使自傑始  
累拜御史大夫卒贈戶部尙書

稽無量字宏度杭州鹽官人精禮及司馬史記擢明經除左  
散騎常侍兼國子祭酒開元五年東巡狩上疏請所過名山  
大川邱陵墳衍古帝王賢臣在祀典者並詔致祭上納之卽  
詔無量祠堯平陽在所刺史參獻七年卒贈禮部尙書

藥子昂寶應初殿中監代宗遣使回紇徵兵討史朝義時回  
紇爲朝義所誘領眾而南眾大駭上使子昂馳勞之及於太  
原北忻州南密數其丁壯得四千人老弱婦女萬餘人馬四  
萬匹與可敦偕來上令僕固懷恩與回紇會因請助討賊回  
紇欲入蒲關經沙苑而東子昂說之曰自寇亂以來州縣殘

虛供億無所資不如取土門路直取邢洛衛懷收賊財帑乃  
鼓而南上策也不聽又說趨懷州太行道南據河陰之險扼  
賊喉又不聽乃說取陝州太陽津路食太原倉粟而東與澤  
潞河南懷鄭兵合從之子昂因入奏上以永王爲兵馬元帥  
進子昂兼御史中丞與中丞魏瑀等爲左右廂兵馬使會回  
紇陝州回紇責王不舞蹈禮倨子昂固拒之回紇君臣不能  
屈乃引子昂與瑀等榜之一夕死

顏真卿字清臣開元進士甲科四命爲監察御史使河隴時  
五原有冤獄久不決天且旱真卿辨獄而兩郡人呼御史雨  
復充河東朔方試覆屯交兵使朔方令鄭延祚母卒二十九  
年殞僧舍垣地真卿劾奏之兄弟終身不齒天下聳動歷拜  
太子太師封魯郡公死節諡忠烈

裴遵慶絳州聞喜人世稱吏事第一上元中同平章事僕固懷恩阻兵汾上代宗以遵慶忠純特遣往汾州宣慰見懷恩具陳朝旨懷恩引過聽命將隨入朝旋爲范志誠所惑以懼死爲辭及乘輿幸陝遵慶自汾州奔行在

楊於陵字達夫宏農人十八擢進士貞元中自京兆少尹出爲絳州刺史將辭赴郡德宗雅聞其名詔留爲中書舍人徙祕書少監順宗初宣詔於太原節府獻遺無所受後歷戶部尙書卒諡貞

馮伉魏州元城人第五經貞元中潞澤李抱貞卒伉以膳部員外郎充弔贈吏抱貞男遺伉帛數百匹不納又專送京師伉因表奏固請不受屬醴泉令闕上謂宰臣曰前使潞澤不受財帛者此人必有清政遂授伉歷拜左散騎常侍卒

溫造字簡與祁縣人大雅五世孫隱王屋山烏重允奏置幕府長慶元年拜起居舍人充太原鎮幽宣慰使未幾又令銜命河東潞澤魏博橫海等道諭以軍期事皆稱旨累轉禮部尙書封祁縣子卒贈右僕射

李回字昭度新興王德良後第進士會昌中累拜刑部侍郎兼御史中丞時方伐劉稹武宗慮河朔列鎮陰相締以撓兵事李德裕薦回持節往諭何宏敬王元逵聽命又張仲武以幽州兵攻回鶴與劉沔不協回至諭以大義仲武釋然卽合太原軍攻潞復以回爲使督戰攻潞至蒲東王宰石雄囊撻謁道左回不弛行願左右呼直史責破賊限牒宰等震恐期六旬取潞否則死之未及期二日賊平進中書侍郎同平章事坐德裕貶終撫州長史

王徽字昭文京兆杜陵人舉進士歷拜同平章事廣明時爲賊所獲力拒僞命乘間竄河中遣人奉表入蜀詔授兵部尙書充東面宣慰摧陣使謀召沙陀三部落破賊以功加尙書右僕射潞州殺其帥成麟以兵部侍郎鄭昌圖權知昭義事軍士不附乃授徽尙書左僕射同平章事潞州大都督府長史澤潞邢洛磁觀察等使時李克用孟方立方爭潞澤以朝廷力不能加表辭乃以昌圖鎮之徽後移疾居蒲州襄王煜僭號復拒僞命卒贈太尉諡曰貞

右唐十四人

任中正曹州濟陰人太宗時第進士以監察御史按晉州盛梁獄論如法遷殿中侍御史旣而有與梁善者密中之出爲荆湖轉運使眞宗時以樞密直學士知并州遷給事中累拜



樞密副使參知政事降秩卒諡康懿

丁度字公雅祥符人第服勤詞學科請選河北河東役兵補禁軍章獻后善之劉平敗上備邊要覽又請民畜一戰馬者得免二丁慶厯中副杜衍宣撫河東拜樞密副使請擇河東馬軍以補禁旅因上慶厯兵錄五卷贍邊錄一卷明年參政政事罷爲觀文殿學士卒諡文簡

歐陽修字永叔廬陵人舉天聖進士試南宮第一擢甲科慶厯中以知諫院奉使河東議者欲廢麟州以省饋餉修曰麟州天險不可廢廢之則河內郡縣民皆不安居矣不若分其兵駐河內諸堡緩急得以應援而平時可省轉輸於策爲便由是州得存又言代州岢嵐多禁地廢田願令民得耕之不然將爲敵有朝廷下其議久乃行歲得粟數百萬斛凡河東

賦歛過重民所不堪者奏罷十數事移河北都轉運使嘉祐  
五年拜樞密副使考天下兵數及三路屯戍多少地理遠近  
更爲圖籍凡邊防久缺屯戍者必加蒐補六年晉參知政事  
神宗初出外以宣徽南院使判太原府辭不拜致仕卒諡文  
忠

吳遵路字安道第進士元昊拒命建請復民兵除天章閣待  
制河東路計置糧草受詔料簡河東鄉民可爲兵者諸路視  
以爲法晉龍圖閣直學士卒遵路廉儉室無長物

段少連字希逸開封人舉服勤詞學科爲殿中侍御史伏閣  
論郭后不當廢後歷度支三司副使河東地震奉使安撫終  
龍圖閣直學士仁宗深歎惜之少連通敏有才遇事無大小  
決遣如流不爲權勢所屈

石延年字曼卿幽州人跌宕在氣節爲太子中允上言天下不識戰三十餘年請爲二邊之備及元昊拒命始思其言命往河東籍鄉兵凡得十數萬延年外似酣放然與人論天下事是非無不當其使河東也吳遵路偕行及卒遵路言於朝特官其一子

張惟吉字祐之開封人爲趙元昊官告使還請預飭邊備及夏竦韓琦謀深入命惟吉募并汾驍勇副以土兵輕齎赴河外惟吉言當持重伺變不宜馳赴不測以自困已而元昊果引去還奏稱旨後爲入內都知卒贈保順軍節度使諡忠安唐義問字士宣介子第鎮廳試從曾孝寬使河東還奏事記利害綱目於笏上取而熟視之歷舉以問應析如流上喜曰欲見卿非今日也終集賢殿修撰

孫昭遠字顯叔眉州眉山人元祐進士辟河東經略司幹營公事靖康元年爲水部員外郎金人圍太原宋師多潰遣折彥質乘傳同昭遠招集汴陷又遣使至太原帥府建炎元年爲西京留守馬叛兵遇害贈徽猷閣待制

滕茂實字秀穎杭州臨安人政和八年進士靖康元年以工部員外假工部侍郎副路允迪出使爲金人所留時茂實兄禔通判代州已先降金粘罕素聞茂實名乃遷之代州又自京師取其弟華實同居以慰其意欽宗自離都城舊臣無敢候問起居者茂實聞欽宗將至卽自爲哀詞且篆宋工部侍郎滕茂實墓九字取奉使黃幡裹之以授其友人甯朔府司理董誥欽宗及郊茂實具冠幘迎謁拜伏號泣金人諭之曰國破主遷所以留君蓋將大用迫令易服茂實力拒不從見

者墮淚茂實請從舊主俱行金人不許憂憤成疾卒雲中茂實墓在代州東六里中州集士大夫哀其忠為之起墳於雁門是也宋史卒雲中似誤詵拔歸錄所為哀詞言於張浚浚以詵為陝西運判官上其事紹興二年贈龍圖閣直學士官其家三人

閻進隸宣武建炎初遣使通問進從行既至雲中府金人拘留使者散處之進亡去追還留守高處裔問曰何為亡進曰思大宋爾慶裔義而釋之凡三亡乃見殺臨刑踊身直起盤旋數四卒南嚮就死

洪皓字光弼鄱陽人少有奇節慷慨有經略四方志登政和五年進士第建炎三年五月時議遣使金國張浚薦皓於呂頤浩皓方居父喪頤浩解衣巾俾易墨衰經入對乃遷皓五官擢徽猷閣待制假禮部尚書為大金通問使龔璘副之皓

至太原留幾一年金遇使人禮日薄及至雲中粘罕迫二使  
仕劉豫皓曰萬里銜命不得奉兩宮南歸恨力不能磔逆豫  
忍事之耶不願偷生願就鼎鑊無悔粘罕怒將殺之旁一帥  
曰此真忠臣也目止劍士爲之跪請流遞冷山雲中至冷山  
行六十日地苦寒四月草生八月已雪而瑋獨至汴受豫官  
當皓之在雲中也二帝遷居五國城皓密遣人奏書以桃李  
栗麪獻二帝始知高宗卽位皓聞祐陵訃北嚮泣血旦夕臨  
諱日操文以祭聞者皆揮涕金參政韓昉嘗令皓校雲中進  
士試皓固以疾辭未幾金大赦許使人還鄉皓與張邵朱弁  
三人在遣中皓自建炎已酉出使至紹興十二年七月還留  
北中凡十五年同時使者十三人惟皓邵弁得生還皓見秦  
檜言室撚寄聲檜怒甚後安置英州至南雄州卒復徽猷閣

學士諡忠宣皓撰松漠紀聞金國文具錄等書于迺遵邁  
朱弁字少章徽州婺源人少穎悟晁說之妻以兄女建炎初  
議遣使問安兩宮弁奮身自獻詔補修武郎借吉州團練使  
爲通問副使至雲中見金宗翰邀說甚切宗翰不聽使就館  
守之以兵弁復與書言用兵講和利害甚悉紹興二年金忽  
遣宇文虛中來言和議可行當遣一人詣元帥府受書還虛  
中欲弁與正使王倫探策決去留弁曰吾來固自分必死豈  
應今日覲倖先歸願正使受書歸報成兩國之好蚤申四海  
之望則吾雖暴骨於外猶生之年也倫將歸弁請曰古之使  
者有節以爲信今無節有印印亦信也願留印使弁得抱以  
死死不腐矣倫解以授弁弁受而懷之臥起與俱金人迫弁  
仕劉豫且誅之曰此南歸之漸弁曰豫國賊吾嘗恨不食其

肉又忍北面而臣之吾有死耳金人怒絕其餼遺以困之弁  
固拒驛門忍饑待盡誓不爲屈金人亦感動致禮如初久之  
復欲易其官弁曰自古兵變使在其間言可從從之不可從  
則囚之殺之何必易其官吾官受之本朝有死而已誓不易  
以辱吾君也且移書耶律紹文等曰上國之威命朝以至則  
使人夕以死夕以至則朝以死又以書訣後使洪皓曰殺行  
人非細事吾曹遭之命也要當捨生以全義爾乃具酒食召  
被掠士夫飲半酣語之曰吾已得近郊某寺地一旦畢命報  
國諸公幸瘞我其處題其上曰有宋通問副使朱公之墓於  
我幸矣眾皆泣下莫能仰視弁談笑自若曰此臣子之常諸  
君何悲也金人知其終不可屈遂不復強會宗翰等亡弁密  
疏其事及金國虛實曰此不可失之時也遣李發等間行歸



報其後倫復歸又以弁祭徽宗文爲獻其辭有曰歎馬角之  
未生魂消雪窖攀龍髯而莫逮淚灑冰天思陵讀之感泣八  
年金使烏林思謀石慶充至杭稱弁忠節詔附黃金三十兩  
以賜十三年和議成得歸以所得六朝御容及宣和御書畫  
爲獻秦檜沮之僅轉奉議郎十四年卒弁文慕陸宣公詩學  
李義山金國名王貴人多遣子弟就學弁因文字往來說以  
和好之利及歸述北方所見聞忠臣義士朱昭史抗張忠輔  
高景平孫益孫谷傅偉文李丹五臺僧寶真婦人丁氏晏氏  
小校閻進朱勤等死節事狀請加褒錄有聘遊集四十二卷

右宋十三人

邢抱樸應州人好學博古統和四年山西州縣被兵命抱樸  
鎮撫之民始安後爲南院樞密使卒

右遼一人

王國綱宏州人有材器爲監察御史開興元年關陝完顏總帥屯河中府與元軍戰敗績哀宗遣國綱乘上廐馬徑詣河中間敗軍之由還至中途值元兵見害

右金一人

趙世延字子敬居雲中至元二十六年爲監察御史按平陽郡監也先忽都賊巨萬甚平允

右元一人

王驥字尙德東鹿人剛毅有膽曉暢戎略中永樂四年進士爲兵科給事中使山西奏免鹽池逋課二十餘萬尋遷山西按察使後累官兵部尙書封靖遠伯卒贈侯諡忠毅

王良永樂間以戶部主事來督大同軍餉甚有威信大爲邊

士所服

魏源字文淵建昌縣人永樂四年進士累遷刑部尙書正統二年命往大同宣府督察諸將便宜從事源按行天城朔州諸險要令將吏分守免屯軍租一年儲火器爲邊備諸依權貴避役者悉括歸伍邊務修飭後致仕卒

李隆字彥平和州人襲父濟襄城伯雄偉有將略讀書好文論事侃侃正統十一年巡邊大同賜寶刀一申飭戒備內外凜凜訖還不戮一人明年卒

盧睿字仲思婺之東陽人永樂辛丑進士爲御史廉正明快正統丁巳升右僉都御史巡視宣大嚴法令剗蠹弊節費廣儲摧強撫弱時北部入貢勢頗張慮其包藏禍心上疏言馭遠之道在恩威相濟辛酉改命參贊甯夏軍務以疾歸性孝

友廉介見義勇爲家無餘資而貧困者多賴之

孫博字約之景州人成化中北部犯大同太監汪直與都御史王越保國公朱永將圍營軍北伐博以紀功從先是博爲給事嘗疏論直直恚甚至是請以爲從或危之博曰諫吾職也死生榮辱吾命也將安避乎既抵大同每出戰輒命隨營博意氣峭拔兜鍪繡襖馳突萬眾間如健將間聚議機宜益侃侃雄辨久之直亦敬服師還論功遷山西按察使僉事致仕歸復疏論本州知州馬某貪虐狀爲所毒馬尋伏誅

李介字守貞高密人成化五年進士歷兵部左侍郎宏治十年瓦剌犯大同命兼左僉都御史往督軍餉且經略之比至寇已退乃大修戎備察核官田牛具錢還之軍以其資償軍所遺馬價邊人咸悅先後條上便宜二十事卒贈尙書

陳壽字本仁其先新淦人籍甯遠衛成化八年進士授戶科給事中視宣大邊防劾去鎮守中官不檢者仕至刑部尙書致仕卒

石玠字邦秀藁城人成化末與弟瑤同舉進士宏治中爲御史出覈大同軍儲條奏悉中機宜正德中爲右副都御史巡撫大同後官至戶部尙書歸卒玠有操行居官亦持正

劉大夏華容人倣儻有大略持正不撓宏治十年大同行師乏糧大夏以戶部侍郎出經畫之或曰北邊糧草半屬京貴子弟公剛介此行恐取禍大夏曰處天下事以理不以勢定天下事在近不在遠候至彼圖之旣至詢咨父老得其要領揭榜通衢云某倉缺糧若干石每石給官銀若干凡境內外官員客商願輸者米自十石以上草自百束以上聽卽中貴

子弟不禁也不兩月倉場有餘積家有餘財邊事賴之尋爲  
兵部尙書卒諡忠宣

楊最字殿之射洪人正德十二年進士授工部主事督漕山  
西憫其民貧不俟奏報輒返尙書李鑑劾之有詔復往最乃  
與巡按御史牛天麟極陳歲災民困狀請緩其征從之仕至  
太僕卿世宗悅方士段朝用言欲令太子監國最極諫杖死  
監國議亦罷隆慶元年贈右副都御史諡忠節

李昆字承裕介子宏治初進士爲兵部員外郎忤尙書劉宇  
貶知解州嘉靖初累官兵部左侍郎大同軍亂殺巡撫張文  
錦昆承制曲赦之還請收卹文錦不從歸卒

夏言上饒人進士嘉靖間以兵科給事中督勦青羊山叛寇  
陳卿一鼓焚其巢穴盜自縛以降奏請置縣以安輯子遺天

子嘉之命其縣曰平順而改潞州爲潞安府累官大學士爲  
嚴嵩所害嵩敗後贈卹謚肅愍

黃縉字宗賢黃巖人孔昭孫也承祖蔭以議禮任詹事又拜  
禮部左侍郎大同軍變殺總兵官李瑾據城拒守總制侍郎  
劉源清提督卻永議屠之百道攻城城中恟懼外勾寇爲助  
塞上大震巡撫潘倣請止兵源清力詆倣大學士張璉及廷  
議並右源清縉獨言非策及源清罷侍郎張瓚往代未至而  
郎中詹榮等已定亂亂卒未盡獲軍民瘡痍甚代王請遣大  
臣綏輯之乃特以命縉且令察軍情勸功罪得便宜行事縉  
馳至大同宗室羣民牒訴官軍暴掠者以百數無告叛軍者  
縉一無所問以安其心有爲叛軍使寇歸者縉執戮之反側  
者復相煽縉大集軍民曉以禍福罹害者陳牒佯不聞而密

以牒授給賑官按里核實一日捕首惡數十人卒尙欽殺一家三人懼不免夜鳴金倡亂無應者遂就擒縉復圖形購首惡數人軍民不復虞註誤乃令有司樹木柵設保甲四隅創社學教軍民子弟城中大安還朝列上文武將吏功罪極詆源清永二人卒被逮縉以勞增俸一等後起禮部尙書兼翰學士歸卒

吳百朋字惟錫義烏人嘉靖二十六年進士歷兵部右侍郎萬厯初命閱視宣大山西三鎮百朋以糧餉險隘兵馬器械屯田鹽法番馬逆黨八事核邊臣督撫王崇古吳兌總兵郭琨以下升賞黜革有差又進邊圖凡關塞險隘番卒部落土馬強弱亭障遠近厯厯如指掌後拜刑部尙書卒

曾乾亨字於健吉水人同亨之弟也萬厯五年進士厯光祿



少卿十八年冬敕兼監察御史閱視大同邊務劾罷總兵官  
以下十餘人大同土兵歲餉萬二千石兵自徵之民不勝擾  
乾亨議留兵二百餘盡汰之屢奏邊備事宜輒中機要晉大  
理少卿歸卒

楊武字宗文岐山人以丙辰進士知潯川決疑獄甚多己巳  
擢大理寺左寺丞受勅勘視大同邊務凡屯田不均軍役耗  
損諸弊政釐正裁革彈劾不少避邊人誦焉庚午超拜左僉  
都御史巡撫宣府地方未幾罷歸

李修吉字允敬同州人萬厯丙戌進士初授萊州司理讞獄  
多所平反遷戶部主事出理甯武糧儲度支明允宿弊一清  
又條議時宜急需四事皆經國要務疏上深見嘉納未幾被  
誣劾掛冠去修吉性醇謹不務紛華尤篤志純儒業著理學

通言二卷

右明十八人

國朝

朱軾字可亭高安人康熙六十年山陝大饑軾時以左都御史遭父憂奪情

聖祖發帑金五十萬兩命與光祿卿盧詢分往督賑軾抵平陽疏陳賑濟事宜皆報可於是察官吏安流庸禁遏糴招米商設粥廠立醫局補驛夫借給民人牛種發倉平糶富民出財助賑者即時奏請旌獎全活數十萬人會苦旱爲文禱神越日大雨又以積貯多有名無實乃瀝陳冒銷虧耗及出陳易新時捐勒淨收諸弊請飭督撫嚴禁并勸所屬買補缺額爲荒備皆如所請飭行是年九月還朝奏請解任營葬

溫旨慰諭命再往山西試行水利社會因督賑時會條奏及此也會陝西有查辦之獄復奉命自晉入秦事遂中止後官至文華殿大學士卒諡文端

劉統勳字延清諸城人性強直勵清節爲都御史彈劾不避權貴乾隆二十二年以刑部尙書奉

命按獄山西並清查虧空一時墨吏罷斥幾盡而循良者多獲保全踰年歸化城有私伐官木之案復以協辦大學士奉命偕巡撫塔永甯往鞠得實自將軍以下悉按如律輶車所歷中外肅然終東閣大學士諡文正

松筠字湘浦蒙古正黃旗人嘉慶中官至武英殿大學士道光六年以尙書按事山西聞喀什噶爾軍報疏陳熟悉新疆情形自請前往宣諭十二年蒙古達爾漢茂明安土默特三

於爭地松時年八十矣方休致家居

命往歸化城查辦松嘗以故相爲察哈爾都統攝綏遠城將軍清望素孚於中外邊人聞其至額手相慶三部王公奉命惟謹乃周行疆域表山爲界設鄂博并增卡倫十餘處令諸部撥兵守之而邊防益固迄今永賴還朝後二年卒謚文清歸化城商民祀之費公祠素工學纂書所書虎字人多寶貴之

右使臣

灌嬰睢陽人販糴以中涓從漢王封穎陰侯七年從擊韓王信於代至馬邑別降樓煩以北六縣斬代左將破胡騎將於武泉北復從擊信胡騎晉陽下所將卒斬胡白題將一人又受詔并將燕趙齊梁楚車騎擊破胡騎於碣石遂至平城從

擊陳豨別攻豨將有功文帝立爲太尉三歲爲丞相後歲餘卒諡曰懿侯

陳平陽武戶牖鄉人少好讀書治黃帝老子之術歸漢爲都尉六年封戶牖侯七年從擊韓王信於代至平城白登被圍七日不得食高帝用平奇計使關氏爲解圍得開高帝既出其計祕世莫得聞更封爲曲逆侯十年從擊陳豨惠帝六年爲左丞相後與太尉周勃謀誅諸呂立文帝文帝二年卒諡曰獻侯

夏侯嬰沛人高祖以嬰爲太僕常奉車賜爵昭平侯更食汝陰剖符世世勿絕從擊代至武泉雲中益食千戶從擊韓王信軍胡騎晉陽旁大破之追北至平城爲胡所圍七日不得通高帝使使厚遺關氏冒頓乃開其圍一角高帝出欲馳嬰

固徐行弩皆持滿外擣卒以得脫益食嬰細陽千戶文帝八年卒諡曰文侯

韓安國梁城安人嘗受韓子雜家說於騶田生所事梁孝王有忠直聲建元六年爲御史大夫元光元年雁門馬邑豪聶翁壹因大行王恢言上曰匈奴初和親親信邊可誘以利陰使聶翁壹爲間亡入匈奴曰吾能斬馬邑令丞吏以城降財物可盡得單于許之時安國與恢力辯卒從恢議伏車騎材官三十餘萬匿馬邑旁谷中衛尉李廣爲驍騎將軍太僕公孫賀爲輕車將軍大行王恢爲將屯將軍大中大夫李息爲材官將軍而安國爲護軍將軍諸將皆屬護軍約單于入馬邑而漢兵縱發王恢李息李廣別從代主擊其輜重單于入漢長城武州塞覺引兵還漢兵追至塞度弗及罷安國後行

丞相事元朔二年卒

程不識孝景時以數直諫爲大中大夫爲人廉謹於文法元光元年衛尉李廣爲驍騎將軍屯雲中不識爲車騎將軍屯雁門廣行無步曲行陣就善水草屯舍人人自便不擊刁斗自衛幕府省文書然亦遠斥堠未嘗遇害不識正步曲行伍營陣擊刁斗吏治軍簿至明軍不得自便不識曰李將軍極簡易然虜卒犯之無以禁而其士亦安佚樂爲之死我軍雖煩擾而虜亦不得犯我是時漢邊郡李廣程不識皆爲名將入爲長樂衛尉

賈復字君文南陽冠軍人王莽末爲縣掾迎鹽河東會遇盜賊等比十餘人皆放散其鹽復獨完以還縣縣中稱其信更始中光武安輯河北復因鄧禹得召見建武初拜爲執金吾

十三年定封膠東侯三十年卒謚曰剛侯

張宗字諸君南陽魯陽人更始以宗爲偏將軍宗見更始政亂因將家屬客安邑及大司徒鄧禹西征定河東宗詣禹自歸禹聞宗素多權謀乃表爲偏將軍禹軍到柤邑赤眉卒至戰卻之後遷瑯邪相卒於官

杜茂字諸公南陽冠軍人初歸光武於河北常從征伐建武三年以功拜驃騎大將軍七年詔引兵北屯田晉陽廣武以備邊九年與雁門太守郭涼擊盧芳將尹由於繁時芳將賈覽率騎萬餘救之茂戰軍敗引入樓煩城時盧芳據高柳數寇邊十二年遣謁者段忠將眾郡弛刑配茂鎮守北邊因發邊卒築亭候修烽火又發委輸金帛繪絮供給軍士并賜邊民冠蓋相望茂亦建屯田驢車轉運尹由將賈丹等遂詣雁



門太守郭涼降芳亡入塞北定封參蓮鄉侯卒

王霸字元伯潁川潁陽人從光武渡河北破王郎建武初拜偏將軍九年與吳漢等四將軍五萬餘人擊盧芳將賈覽閔堪于高柳遂拜上谷太守領屯兵如故捕擊邊寇無拘郡界十年吳漢等四將軍六萬人出高柳擊賈覽詔霸與漁陽太守陳訢將兵爲諸軍鋒左南將軍將數千騎救覽霸等連戰於平城下破之還入雁門與驃騎大將軍杜茂會攻盧芳將尹由於崞繁時不克盧芳與南部烏桓連兵寇盜尤數緣邊愁苦十三年詔將弛刑徒六千餘人與杜茂治飛狐道堆石布土築起亭障自代至平城三百餘里凡大小數十百戰讖邊事數上書言宜結和親又陳委輸可從濕水漕以省陸轉輸之勞事皆施行後南部烏桓降服北邊無事霸在此谷二

十餘歲三十年定封淮陵侯永平二年以病免後數月卒

吳漢字子顏南陽宛人爲安樂令說太守彭寵歸光武帝帝  
即位以功拜大司馬封舞陽侯建武三年率建威大將軍耿  
弇虎牙大將軍蓋延擊青犢於軹西大破降之十五年率揚  
武將軍馬成捕虜將軍馬武擊塞北徙雁門代郡上谷吏人  
六萬餘口置居庸常山關以東二十年卒諡曰忠侯

馬援字文淵扶風茂陵人少有大志建武十七年拜伏波將  
軍擊交趾封新息侯二十四年烏桓寇扶風援出屯襄國明  
年秋將三千騎出高柳行雁門代郡上谷障塞烏桓侯者見  
漢軍至遂散去援無所得而還二十四年征五溪蠻病卒建  
初三年追諡曰忠成侯

馬嚴援兄子永平十五年拜將軍長史將北軍五校士羽林

禁兵三千人屯西河美稷衛護南部聽置司馬從事牧守諸  
敬同之將軍敕嚴過武庫祭蚩尤帝親御阿閣觀其士眾時  
人榮之年八十二卒

右漢十二人

鍾繇字元常潁川長社人建安中以司隸校尉持節督關中  
諸軍會單于擾平陽率諸軍圍之未拔而袁尙河東太守郭  
援到眾甚盛諸將議欲釋之去繇曰袁氏方強援之來關中  
陰與之通所以未悉叛者顧吾威名故耳若棄而去示之以  
弱所在之民誰非寇讐縱吾欲歸其得至乎此爲未戰先自  
敗也且援剛愎好勝必易吾軍若渡汾爲營及其未濟擊之  
可大克也時張旣說馬騰騰遣子超將精兵逆之援至果輕  
渡汾眾止之不從濟水未半擊大破之斬援降單于後詔徵

河東太守王邑邑心不願徵郡掾衛固及中郎將范先等詣  
繇求乞邑而後太守杜畿已入界繇不聽先等促邑交符邑  
乃歸許固尋與張晟張揆及高幹等並爲寇又率諸將討破  
之繇封定陵侯仕至太傅卒諡曰成

張旣字德容馮翊高陵人舉茂才司隸校尉鍾繇遣說馬騰  
等騰遣子超會擊袁氏并州刺史高幹河東太守郭援大破  
之斬援幹降而復舉兵河東衛固等應之以旣爲議郎參繇  
軍事徵馬騰等會擊斬固幹奔荊州魏時封西鄉侯卒諡曰  
肅

呂虔字子洛伍城人魏太祖在兗州聞虔有膽策以爲從事  
將家兵守湖陸襄陵尉杜松部民旻母等作亂與昌稀通太  
祖以虔代松虔到招誘旻母渠帥及同惡數十人賜酒食簡

壯士伏其側察其母等醉盡格殺之撫其餘眾羣賊乃平太祖以虔領太山太守徐州刺史封萬年侯

右魏三人

李崇孝武時爲尙書令貴戚重望器識英敏沃野鎮民破六韓拔陵反加北討大都督命將軍崔暹廣安王深皆受節度敗於白道崇引還雲中謂諸將曰雲中者白道之衝賊之咽喉若此地不全則并肆危矣乃請費穆爲朔州刺史以鎮之先是崇擊柔然阿那瓌於平城長史魏蘭根說崇曰昔緣邊諸鎮地廣人稀或徵發中原強宗子弟或國之肺腑寄以爪牙中年以來有司號爲府尹役同廝養理當憤怨宜改鎮立州分置郡縣凡是府尹悉免爲民入仕次敘一準其舊文武兼用威恩並施此計若行國家庶免北顧之憂崇奏之不報

及東西部敕勒皆叛附拔陵始思崇之言乃詔諸州鎮軍實  
非有罪配隸者皆免爲民改鎮爲州遂破拔陵

右後魏一人

侯莫陳穎字遵道崇子賜爵廣平侯累遷開府儀同三司武  
帝時從滕王迺擊龍泉文城與柱國豆盧勣分路而進穎懸  
軍五百餘里破其三柵先是稽胡亂輒略邊人爲奴婢至是  
詔諸部有厭匿良人者誅籍沒其妻子有人言爲胡村所隱  
匿者勣將誅之穎曰將在外君命有所不行諸部固非悉反  
但相迫脇爲亂今慰撫自可不戰而定如卽誅之轉相驚恐  
爲難不細未若召其渠帥以隱匿者附之令自歸首則眾可  
安勣從之諸部爭降附北土以安後入隋累厯州郡以清德  
惠政稱開皇末檢校汾州事卒諡定

許善心字務本高陽北新城人初任陳舉秀才對策高第入  
隋續成父亨所撰梁史行世大業十一年從幸雁門爲突厥  
所圍攝左親衛武賁郎將領江南士宿衛殿省以勳授通議  
大夫後于江都爲宇文化及所害越王贈左光祿大夫高陽  
縣公諡曰文節

斛斯萬善河南人驍勇果毅以軍功拜武賁郎將突厥圍雁  
門萬善奮擊之所向皆破每賊至獨出當其鋒或下馬坐地  
引強弓射賊所中皆殪由是莫敢逼城十餘日竟退萬善之  
力也其後頻討羣盜累遷將軍卒

右隋三人

李道宗高祖從子武德元年封略陽郡公劉武周逼河東道  
宗年十七從太宗率眾拒之登玉壁城望賊請深壁高皇以

挫其鋒若糧運致竭自當離散後賊果食盡夜遁追及介州  
一戰破之出爲靈州總管始突厥郁射設入居五原道宗逐  
出之震耀威武斥地千里貞觀三年爲大同道行軍大總管  
與李靖襲破頡利道宗親執之累封江夏王坐事削封邑斗  
三年出爲晉州刺史十四年拜禮部尙書永徽初加特進坐  
房遺愛流象州道卒

李高遷岐州岐山人隋末客遊太原高祖常引之左右擒高  
若雅王威有力焉從平霍邑力戰功最

劉宏基雍州池陽人大業末以右勳侍從征遼東行至汾陰  
度已後期遂與同旅屠牛潛諷吏捕繫縣獄事解亡命至太  
原會高祖鎮太原遂自結託尤委心太宗大蒙親禮義兵舉  
功爲第一宋金剛陷太原遣屯晉州後從屯柏壁率兵二千



自隰州趨西河斷賊歸路及金剛遁宏基率騎邀之至于介休與太宗會追擊大破之累封任國公改號國永徽元年卒贈并州都督諡曰襄

李靖本名藥師雍州三原人姿貌瓌偉有文武材略大業中累除馬邑郡丞義兵將起靖自鑠上變至長安道塞而止高祖克長安執靖將斬之靖大呼曰公起義兵本爲天下除亂乃以私怨斬壯士乎高祖壯其言秦王又固請捨之尋入秦王幕府從趙郡王孝恭破開州蠻冉肇則上手敕曰旣往不咎向事吾久已忘之遂平東南地亘萬里武德八年突厥寇太原以靖爲行軍總管與張瑾屯太谷時諸軍不利獨靖以完軍歸貞觀初以刑部尙書檢校中書令三年轉兵部尙書爲代州道行軍總管率驍騎三千自馬邑直趨惡陽嶺以逼

突厥四年進擊定襄破之獲隋齊王子楊正道及隋蕭后送于京師可汗脫身遁磧口以功進封代國公又以靖爲定襄道行軍總管引兵襲頡利牙帳殺其妻義成公主擒頡利以獻斥地自陰山北至大漠上因大赦天下賜民五日酺拜尙書右僕射九年破吐谷渾改封衛國公十三年卒諡曰景武韓游瓌靈武人始爲朔方節度郭子儀裨將安祿山使阿史那從禮將同羅突厥五千騎僞降於朔方出塞門誘河曲九蕃府六胡叛部落五十萬子儀使游瓌率辛京杲擊破之九蕃府還附以功累拜邠甯節度使檢校尙書左僕射與馬燧渾瑊共平河中終右龍武統軍諡曰襄

王逢許州人忠武軍節度沛子以功歷諸衛將軍太和中從石雄劉沔破回紇於天德軍王宰攻劉稹逢領陳許七千人

屯翼城賊平累遷忠武節度使

張仲武范陽人通左氏春秋會昌中節度范陽與太原劉沔攻回鶻不協時御史中丞李回奉使至喻以和協仲武聽命回鶻欲入五原塞掠保塞雜虜先令宣門將軍四十七人結歡仲武賂其下盡得所謀因逗留不遣使失歸期回鶻人馬多斃劉稹拒命移沔鎮滑臺命仲武領太原軍攻之以功封蘭陵郡公加檢校司徒同中書門下平章事卒諡曰莊

右唐六人

何繼筠字化龍河南人開寶元年爲李繼勳先鋒勝洞渦河奪汾橋二年屯兵陽曲縣大敗遼援師于石嶺關以功拜建武軍節度卒繼筠深沈有智勇前後備邊二十年在棗州尤久邊人多畫像祠之

曹翰大名人宋初從征澤潞開寶二年從征太原爲行營都  
壕砦使太平興國四年從征太原爲攻城南面都部署上曰  
卿習勇無雙西北面非卿不能當築土山穿渠遂平之官威  
塞軍節度卒贈太尉諡武毅

崔翰字仲文京兆萬年人宋初從征澤潞開寶初遷河東降  
民以寶陝西地晉人勇悍多習武藝命翰差擇之及閱試河  
北鎮兵取其驍果者以分配天武兩軍四年從征太原命總  
侍衛馬步諸軍率先攻城流矢中其頰神色不變督戰益急  
上卽軍帳撫問之及劉繼元降令往撫慰俘略無得出城時  
秦王廷美以數十騎將冒禁出翰呵止之仕至鎮安軍節度  
使卒贈侍中翰驍勇有謀多立功輕財好施以徐河功號名  
將

梁迥博州聊城人開寶中從征太原會聶章爲沁州兵馬部  
署以迥監其軍并人入寇與閻彥進同率兵擊敗之太平興  
國初領禁軍戍澤州四年征太原爲行營前軍馬步軍都監  
督軍攻城中流矢四五年受詔與潘美城并州於三交及築  
緣邊保障仕至唐州防禦使卒于銀州

劉審瓊涿州范陽人給事太祖左右從平澤潞開寶中樞密  
使李崇矩客鄭伸擊登聞鼓誣告崇矩受太原席義叟黃金  
私結學士扈蒙以甲科私義叟引審瓊爲證召詰問審瓊具  
言其誣枉得解遂出知鎮州七年征河東駐蹕月餘儲待無  
闕至道中卒

李神祐開封人從太祖征太原攻城時往來梯衝間宣傳詔  
命卽行在所遷殿頭高品乾德五年征太原負御寶從行開

寶二年又從征太原時有詔緣邊和市軍儲車駕在潞州聞之慮擾民令神祐馳驛止之時詔下已五日神祐一夕而及晉陽一日甲士旣陣賊潛縱火焚梯衝亟命神祐部衛兵爲援斬賊甚眾餘悉潰去太宗再征太原領工徒千人隨駕以備繕完甲兵劉繼元表納降款太宗陳儀衛城北臺以受之繼元移時未至神祐馳單騎入城俄頃引繼元至太平興國六年滑州治河防材葦未具命神祐馳往垣曲伐薪蒸四百萬以濟其用後爲大內都知卒

李漢瓊河南洛陽人以功領振武軍節度太平興國四年征太原爲攻城都部署主南偏漢瓊先登矢集其腦併中指傷甚猶力疾戰上召至幄殿賜良藥慰勞之先是攻城者以牛革冒木上士卒蒙之而進謂之洞子上欲幸其中以勞士卒

漢瓊極諫以為矢石之下非萬乘所宜輕往乃止晉陽平加  
檢校太尉卒贈中書令

荆嗣冀州信都人罕儒從孫從李繼勳攻河東請間道截洛  
陽若漢兵遁進薄汾河橋敗漢將楊業兵焚南門奪羊馬城  
從太祖征太原漢兵焚洞子與殿前楊信援之率先陷陣召  
見補御龍直太宗再征嗣自陳願率一隊先登命主城西洞  
子車駕巡師嗣登城手刃數人足貫雙箭手中礮折二齒亟  
召賜錦袍銀帶雍熙二年從田重進譚延美率師入遼境疾  
戰飛狐口敗遼將大鵬翼奪土嶺克倉頭小泊二砦遼圍直  
谷石門二砦一日五七戰遼兵引去又勝於大嶺師還引見  
便殿重進言其有勞後累任部署卒

田重進幽州人太平興國四年從征太原還錄功擢天德軍

節度使雍熙中北征率兵傅飛狐城下伏兵飛狐南口擒遼驍將大鵬翼及監軍馬贊副將何萬通并渤海軍三十餘人斬數千級俘獲萬計遂北四十里連下飛狐靈邱等城進攻蔚州其牙校李存璋等殺蕭嘏里執耿紹忠率吏民來附會曹彬師不利乃還卒贈侍中

賀懷浦開封陳留人孝惠后兄也太平興國初以岳州刺史領兵屯三交雍熙三年從楊業北征沒於陣

种師中字端孺師道弟靖康中提秦鳳兵入援遣副姚古爲河北制置使古援太原師中援中山河間或謂師中自礮相而北金人若下太行則勢不能自還此段疑師于河上比也師中渡河卽上言粘罕已至澤州臣欲由邢相間捷出上黨擣其不意當可以遲疑不用姚古不能解太原圍詔師中由



井陘道出師與古犄角次平定軍乘勝復壽陽榆次留屯正定而知樞密院許翰遣督戰且責以逗撓師中歎曰逗撓兵家大戮也吾結髮從軍今老矣忍受此爲罪乎卽日辦嚴約古及張灝俱進古灝失期不至五月抵壽陽之石阬五戰三勝同趨榆次力疾鬪死師中老成持重爲時名將諸軍自是氣奪劉韜言師中聞命卽行奮不顧身雖古忠臣不過也請加優贈以勸死國者詔贈少師諡莊愍

張忠輔宣和末爲將同崔中折可與守崞縣金人來攻嬰城固守率士卒以死拒敵中度不可支有二心忠輔宣言曰必欲降請先殺我中設伏給約議事斬忠輔首擲障外旣開城門可與不屈見殺可與兄可求建炎中言於朝官可與子五人而忠輔不與士論惜之

黃友字龍友温州平陽人七歲能詩長入太學每謂同舍曰大丈夫不能爲國立功是亦造化中贅物耳登崇寧五年進士第累立戰功除直祕閣時常勝軍郭藥師叛諸郡響應友率數千人躬冒矢石與戰欽宗召問稱嘆進直徽猷閣制置司參謀隨种師中解太原圍引兵奪榆次縣明日進十里而止友自師中以非地不聽嘆曰事去矣黎明士卒奔潰友被執寇曰降卽赦汝友厲聲曰男兒死耳罵不絕口寇怒以脂塗其身倒豎焚之朝廷贈官至中大夫御書忠節傳家字并其門閭官其後八人錫命有云緣廟謨之失策致榆次之憤師兵盡道窮執節不撓特優贈典用慰忠魂

岳飛字鵬舉相州湯陰人建炎初借補武經郎渡河戰于太行山擒金將跋跋耶烏復斃黑風大王後制置荆湖紹興六

年太行山忠義社梁興等百餘人募飛率眾來歸晉宣撫使  
七年命宣撫河東節制河北路張浚曰飛措畫甚大今已至  
伊洛則太行一帶山砦必有應者十年命梁興渡河糾合忠  
義社取河東北州縣興會太行忠義及兩河豪傑等累戰皆  
捷先是五年飛遣興等布德意招結兩河山砦韋銓孫謀等  
歛兵固堡以待宋師李通胡清李寶李興張恩孫琪等舉眾  
來歸金人動息山川險要一時皆得其實盡磁相開德澤潞  
晉絳汾隰之境皆期日興兵與宋軍會其所揭旗以岳爲號  
父老百姓爭挽車牽牛載糗糧以餽義軍頂盆焚香迎候者  
充滿道路而秦檜亟下班師詔十一年授樞密副使位參知  
政事爲檜所害

仲連昌元人建炎初金人犯河中守臣席益遁去時仲連

引兵屯河中就權府事率眾與金人力戰度不能守先自殺其家人賊陷不屈而死

右宋十五人

耶律奚底孟父楚國王之後便弓馬勇於攻戰統和四年爲右皮室詳穩時宋將楊繼業陷山西郡縣從樞密使斜軫禦之凡戰必以身先矢無虛發繼業敗於朔州之南匿深林中奚底望袍影而射繼業墮馬先是軍令須生擒繼業奚底以故不能爲功後屢有戰績卒

右遼一人

完顏訛可內族也時有兩訛可皆護衛出身一曰草火訛可每得賊好以草火燎之一曰板子訛可正大八年以兩訛可將兵二萬守河中九月元兵來攻十一月攻愈急軍士日夜

死國十二月城陷草詔可戰數十合被擒為元兵所殺板詔可率敗卒三千奪船走閔鄉杖死人謂河中城守不下德順多斃之

右金二人

貳木台扎拉台人太宗時嘗駐軍太原平陽土人德之皆為立祠

魏賽因不花息州人至正間以河南省右丞統兵守偏頭關克武州不戮一人民為立碑思之

右元三人

徐達字天德濠人洪武元年拜大將軍命趨山西襲擴廓營盡降其軍遂克太原乘勢收大同會馮勝軍破賀宗哲於石州山西盡平五年復出中道達封魏國公官太傅中書右丞

相參軍國事十八年卒追封中山王謚武甯

傅友德宿州人洪武元年略大同還下正保從攻山西擴廓自保安來援萬騎突至友德以五十騎衝卻之因夜襲其營擴廓倉皇遁去追至天門關獲其士馬萬計復敗賀宗哲於石州後封潁國公二十四年出練兵山陝總屯田事二十五年練軍山西二十七年被害後追封麗江王謚武靖

康茂才字壽卿蘄州人嘗爲都水營田使修水利興屯田洪武元年從經略中原留守陝州規運饋餉造浮橋渡師鎮河中撫綏瘠民立石頌德招來絳解二州扼潼關秦兵不敢東陝西平移鎮山西卒追封蘄國公謚武義子鐸以父功封蘄春侯卒于淵幼未襲授散騎舍人已而革冠服勒居山西遂不得嗣宏治末錄茂才後爲世襲千戶

馮勝定遠人洪武元年由懷慶踰太行克碗子城取澤潞擒  
元右丞賈成于猗氏克平陽絳州詔右副將軍勝居常遇春  
下偏將軍湯和居勝下偏將軍楊璟居和下迷渡河趨陝後  
封宋國公數練兵大同拜大將軍二十五年命籍太原平陽  
民爲軍立衛屯田尋偕穎國公傅友德練軍山西諸公侯皆  
聽節制二十七年被害

李文忠字思本盱眙人洪武二年命會攻慶陽師次太原聞  
大同圍急曰兵可無西也援大同便軍吏曰專命可乎文忠  
曰閩外之事苟利於國專之可也遂出雁門大破北師拜左  
副將軍封曹國公六年行山西邊留屯代縣七年由白登秋  
進師豐州擒故官十二人馬駝牛羊甚眾窮追至百千兒乃  
還卒追封岐陽王諡武靖

譚廣字仲宏丹徒人領神機

馬獨肥時號譚家馬從征池

北充驍騎將軍十一年練軍山西十二年從征九龍口爲前鋒賊數萬憑崖廣以神箭萬人射之死者無算乘勝夾擊賊大敗論功進都督僉事後鎮宣府二十年稱名將封永甯伯卒諡襄毅

蔣琬江都人定西侯貴孫嗣侯成化中督十二團營兼總神機營上言大同宣府諸塞下腴田無慮數十萬悉爲豪右所占請遣給事御史按覈定其科額時不盡行十三年帥京軍防秋大同宣府陳機宜十餘事皆報可累加太保卒諡毅敏馬永字天錫遷安人驍果有謀習兵法正德中充總兵官鎮薊嘉靖初大同兵變命桂勇爲總兵官往鎮而議將撫之永言逆賊干紀朝廷赦其脅從恩至渥顧猶抗命今不勦春和



北寇南牧叛卒勾連禍滋大宜亟調鄰鎮兵剋期攻城曉譬利害懸破格之賞令賊自相斬爲功元凶不難殄也乃命丞督諸軍與侍郎胡瓚往會亂平乃還鎮後請宥議禮諸臣奪官及大同軍再亂廷臣交薦召至已就撫復還起鎮遼東卒王邦直磁州人偉幹多力嘗持千斤器移數處不爲疲號千斤以臺諫薦兵部檄送督府翁萬達待以殊禮分坐談邊務乙巳秋比部入犯鴉鵠峪邦直佐守將張鳳射卻之轉戰而前敵大合鳳與邦直結方陣以拒之鳳戰死或勸邦直潰圍出邦直撫膺曰吾誓以腔血報軍門鳳死吾豈忍獨生遂揮刃向前擊殺數人知不得脫乃自刎翁爲疏請錄卹立祠祀之

俞大猷字志輔晉江人從趙本學學易推行兵家奇正虛實

之權從李良欽學劍棄諸生嗣世職百戶舉嘉靖十四年武  
會試二十一年俺答大入山西詔天下舉武勇士大猷詣巡  
按御史自薦上其名兵部毛伯溫爲尙書送之宣大總督翟  
鵬所召見論兵事大猷屢折鵬鵬謝曰吾不當以武人待子  
下堂禮之驚一軍然亦不能用後爲浙江總兵勦岑港倭幾  
平而御史劾之令立功塞上大同巡撫李文進習其才與籌  
軍事乃造獨輪車拒敵馬嘗以車百輛步騎三千大挫賊安  
銀堡文進上其制於朝遂置兵車營京營有兵車自此始文  
進將襲板升謀之大猷果大獲詔還世蔭寇掠廣武復拒卻  
之萬厯初卒於後府僉書贈左都督諡武襄

李卑字侍平榆林人崇禎中累官孤山副總兵陝賊多流入  
山西詔卑及賀人龍各率部卒千隸宣大總督張宗衡麾下

會王自用陷遼州聞官兵至棄城去六年春諸軍入城多殺良民冒功卑獨嚴戢其下無所擾已敗賊於陽城賊入濟源山中又敗之於天井關移討河北賊進總兵官七年卒贈右都督卑所至軍民安堵當倉卒鎮靜如常

右明十一人

國朝

葉臣滿洲鑲黃旗人順治元年以都統招撫山西自懷慶進兵所過郡縣皆下賊將據太原會師攻克之置官屬安輯居民明定西伯唐通副將董學禮從賊擁眾邊關並招降之而訪得故翰林朱之俊主事胡全才等十二人以禮徵薦起之於家

石廷柱遼東人隸漢軍正白旗順治元年以都統率兵同葉

臣攻克太原又與覺羅巴哈納自汾州趨平陽大敗賊於西山寨俘斬甚眾以南州縣爲賊據者悉平六年姜瓖反大同從睿親王復渾源州又從巽親王復朔州汾州及太谷諸縣後官鎮海將軍所在戢兵安民民間稱爲石佛卒諡忠勇巴顏漢軍正藍旗人襲父李永芳子爵順治元年以都統同葉臣進兵山西徇澤州潞安皆下之遂克太原五年率左翼兵載紅衣礮赴大同討叛鎮姜瓖在軍中每指麾礮隊以攻堅城所向皆克以功進三等伯九年卒年三十三李率泰其兒也官刑部侍郎兼副都統姜瓖之叛嘗從征攻下保德州斬賊黨牛化麟後仕至浙閩總督

達素滿洲鑲黃旗人順治元年以護軍從征山西敗賊兵於太原攻克絳州追賊至黃河賊得舟渡督兵射之賊多墮水

死六年隨英王征大同敗賊於右衛已而賊大至奮前搏擊  
飛矢及其喉兩手足並中傷遂墮馬軍校欲負以退叱曰死  
則死耳何避賊爲裏創督戰卒敗之以功累遷都統爲內大  
臣

孟喬芳字心亭其先永平人世襲東勝衛指揮同知喬芳偉  
岸善騎射能以一矢墮雙雁爲刑部承政兼梅勒章京管牛  
象事順治元年帥師追賊李自成踰太行定汾潞拔太原遂  
渡河入關以兵部右侍郎兼都察院右副都御史總督三邊  
軍務大同降將姜瓖變其黨虞允韓昭宣陷河東號二十八  
萬七月喬芳引兵赴援馳赴潼關賊兵拒河守乃佯置巨艦  
於上流伐鼓揚旗作欲渡狀而夜率師從下流徑渡急擊之  
賊勢披靡戰且走四十餘里比明抵蒲州賊迎敵喬芳督將

士力戰殺賊七千餘人賊棄城遁遣將復臨晉榮河猗氏解州又合兵圍運城城破賊黨殲焉遂定平陽後以兵部尙書累加少保卒諡忠毅

根特滿洲鑲藍旗人以協領駐防西安叛鎮姜瓖踞大同其黨虞允白璋張萬全陷蒲州及臨晉猗氏河津諸縣隨總督孟喬芳統兵渡河勦賊復蒲州臨晉河津進征平陽白璋糾步騎六千至榮河迎戰奮擊大破之斬三千餘級復逐至黃河賊未及濟我師薄之溺水死者無算遂斬白璋餘竄入吉鎮悉殲焉移師趨猗氏偽監軍衛登芳依山結寨與張萬全爲犄角以抗復分兵擊斬萬全殲其眾移師轉戰生擒登芳陣斬僞將王國興等三十人復敗僞都督郭中傑兵於聞喜追奔三千里斬獲無算仍還西安後以都統列議政大臣卒

謚襄壯

畢力克圖蒙古正藍旗人姜瓖之亂以副都統駐防平陽借巴圖魯羅多渾勦賊太平遇賊黨郭中傑引眾寇絳州擊敗之又敗賊騎千餘於張湖村七年同西安協領根特圖太平城逾二旬不下乃因城濠掘地道然火藥以墮其城師入叛臣李建泰及其黨俱伏誅康熙中以都統列議政大臣叛鎮王輔臣之亂授平逆將軍帥師駐大同尋渡河擊賊榆林破之卒謚恪僖

李延壽鑲藍旗人順治五年以鎮朔將軍總兵宣府姜逆之亂五臺被圍急延壽聞之拜表徑提兵往援偵寶村爲賊巢羊言往代州進勦而潛師出峨口夜抵寶村金戈鐵馬鏗鳴遼衛賊懼伏莫敢動擒斬無遺其脅從來投者日數百人慰

諭復業令入山谷招其徒黨賊乃解圍聚堯山砦以守砦高  
數百丈四而陡絕賊掠財物輸其間猝難破遂設長圍圍之  
越數月賊少懈募死士數十夜半綴組直造砦門鳴鼓賊駭  
潰宵墜崖死尋榜示民凡賊虜掠聽還之或誣張某胡某通  
賊搆至卽羅之而治告者以法在五臺二年班師焚香送者  
數百里不絕已復建祠祀之

右客將



山西通志卷一百十五